



11. november 2025

Udlændinge- og
IntegrationsministerietNordatlantiske Anliggender
Slotsholmsgade 10
1216 København KTel. 6198 4000
Mail uim@uim.dk
Web www.uim.dk

CVR-nr. 36977191

Sagsbehandler
Caroline ElmbergTel. 61 98 36 41
Mail cae@uim.dkSags nr. 2024 - 14991
Akt-id 3131033

EQIKKAANEQ

**Nunami allamiut pillugit inatsisip allanngortinneqarnera pillugu
inatsisit assigiinngitsut ilaannik Kalaallit Nunaannut
atuutilersitsinissaq pillugu peqqussummut missingiut**

Nunami allamiut pillugit inatsit peqqussutikkut nr. 150-ikkut, 23. februar 2001-imeersukkut, Kalaallit Nunaanni pissutsinut naleqqussaannerit allannguutigalugit, Kalaallit Nunaannut atuutilersinneqarpoq. Ukiuni kingullerni EU-p peqqussutai arlallit, Schengenimi suleqatigiinnermut aamma killeqarfiit nakkutigineqarnerannut annertuumik pingaaruteqartut, akuersissutigineqarsimapput, matumani SIS pillugu peqqussutit nutaat pingasut, EES pillugu peqqussut aamma ETIAS pillugu peqqussut ilanngullugit, taakkulu tamarmik nunami allamiut pillugit inatsisip allanngortinneqarnera pillugu inatsisit assigiinngitsut aamma Danmarkip Schengenimi isumaqatigiisummik akuersissuteqarnera pillugu inatsisip allanngortinneqarnera pillugu inatsisit assigiinngitsut atuutilersinneqarnissaat pillugit peqqussutikkut nr. 759-ikkut, 12. juni 2023-imeersukkut Kalaallit Nunaanni naammassineqarput.

1. EU-mi inatsisilerinermut tunngasumik aalajangiinerit unioqqutinneqartussaanngitsut naammassineqarnerisa kingunerisaannik nunami allamiut pillugit inatsimmi malittarisassat atuutilersinneqarneri

1.1. SIS-ip tamakkiisumik atorneqarsinnaanissaanut, nunani pingajuusuni naalagaaffinni innuttaasut inatsisit unioqqutillugit najugaqartut utertinneqarnissaannut ataatsimoorussamik tamanut atugassiat aamma ingerlatseriaatsit pillugit Europa-Parlamentip aamma Siunnersuisoqatigiit peqqussutaata 2008/115/EF-ip, 16. december 2008-imeersup (anisitsineq pillugu peqqussutip), utertitsinissaq pillugu aalajangiinerni nunamut

isernissap inerteqqutigineqarneranut aamma aallarnissamut piffissaliussanut tunngassuteqartut ilaasa, Kalaallit Nunaannut atuutilersinneqarnissaat pisariaqartinneqarpoq. Nunanut allamiunut peqqussummi ilaatinneqartunut, utertinneqarnissaq pillugu aalajangiinerni tamani aallarnissamut piffissaliussamik aalajangersaasoqassasoq, aamma taamaattoqassappat nunamut isernissamut inerteqquteqarnikkut naalagaaffinni ilaasortaasuni tamani nunamut isernissaq aamma najugaqarnissaq inerteqqutigineqassasoq, anisitsineq pillugu peqqussummi aalajangersakkat kinguneraat. Nunamut isernissamut inerteqquteqarnerit aamma aallarnissamut piffissaliussat, aalajangiinerni aalajangersarneqartut, nunani allamiunut, anisitsineq pillugu peqqussummi ilaatinneqartunut Kalaallit Nunaannut aalajangersarneqartut, Danmarkimi naammassineqarnerisut massakkuugallartoq SIS-imi nalunaarutigineqarsinnaanngillat, tassami nunamut isernissamut inerteqquteqarnerit Kalaallit Nunaannut taamaallaat tunngassuteqarmata, aamma Kalaallit Nunaannut aalajangiinerit suussusaanni tamani aallarnissamut piffissaliussaq aalajangersarneqarneq ajormat.

Nunamut isernissamut inerteqquteqarneq aamma aallarnissamut piffissaliussat aalajangersarneqarneri pillugit malittarisassat nunami allamiut pillugit inatsimmi §§ 32-imi aamma 33-imi takuneqarsinnaapput. Nunami allamiut pillugit inatsisip Kalaallit Nunaannut atortuulernera pillugu peqqussutikkut nr. 150-ikkut, 23. februar 2001-imeersukkut aalajangersakkat, taamanikkut imarineqartut imaralugit, aamma Kalaallit Nunaanni pissutsinut naleqqussaanerit allannguutigalugit, Kalaallit Nunaannut aalajangersakkat atuutilersinneqarput. Pisuni arlalinni Kalaallit Nunaannut isernissap inerteqqutiginera aalajangersarneqassasoq, taamaalilluni § 32-imi, Kalaallit Nunaannut atuutilersinneqartumi, takuneqarsinnaavoq. Nunamut isernissap inerteqqutigineqarnerata qanoq sivisutigineqassaa nalunaarutigineqassasoq, piffissamit aallarfiusumit imaluunniit anisitsinermi atuutilissasoq aamma Kalaallit Nunaannit aninerup imaluunniit anisitaanerup kingorna qaammammi siullermi qaammatip aallaqqaataanit naatsorsorneqassasoq, aammattaaq ilaatigut takuneqarsinnaavoq. § 32-imi aalajangersagaq peqqussutikkut nr. 759-ikkut, 12. juni 2023-imeersukkut allanngortinneqarpoq, tassani Naalagaaffinnit Peqatigiinnit imaluunniit Den Europæiske Unionimit aalajangikkamik nunamut isernissaq aamma aqqusaarnissap aalajangiiffigineqarnerani, nunami allamioq iliuutsinik killiliisunik killilersuinerni ilaatinneqarnerat pillugit imm. 8 ilanngunneqarpoq. Kalaallit Nunaanni najugaqarnissamik akuersissut pillugu qinnuteqaatip itigartitsissutigineqarnera, najugaqarnissamik akuersissutip taamaattup arsaarinnissutigineqarnissaa pillugu aalajangiineq aamma §§ 25 a imaluunniit 25 b malillugu Kalaallit

Nunaannit anisitaanissaq pillugu aalajangiineq, aallarnissamut piffissaliussamik imaqqassasoq, § 33-imi, Kalaallit Nunaannut atuutilersinneqartumi, takuneqarsinnaavoq.

Nunami allamiut pillugit inatsisip Kalaallit Nunaannut atuuttup missiutikkut matumuuna takuneqarsinnaasukkut allanngortinneqarnissaa aallarnerniarneqarpoq, taamaalilluni nunamut isernissap inerteqqutigineqarnera, anisitsineq pillugu peqqussummut naalagaaffinnut ilaasortaasunut tamanut atuuttumik aamma taamaammat SIS-imut nalunaaruteqarsinnaaneq pissalluni, aalajangersarneqarsinnaalissalluni.

Kalaallit Nunaanni aamma Danmarkimi nunamut isernissamut inerteqquteqarneq aamma aallarnissamut piffissaliineq pillugit malittarisassat naalagaaffeqatigiinni assigiissarneqarnerat, §§ 32-ip aamma 33-ip aaqqinneqarnerisa atuutilersinneqarnerisa kingunerissavaat. Aalajangiinernut, Kalaallit Nunaannut aalajangerneqartunut, nunamut isernissamut inerteqquteqarneq aamma utertitsinissaq pillugu aalajangiinerit, nunami allamiut pillugit inatsimmi § 58 g, peqqussutikkut nr. 759-ikkut, 12. juni 2023-imeersukkut Kalaallit Nunaanni naammassineqartoq, aamma Kalaallit Nunaata avammut killeqarfiinik nakkutiginninnissap aamma nakkutilliinissap qulakkeerneqarnissaanut Danmarkip pisussaaffigisaa, ileqqoq malillugu imaluunniit inatsisilerinermut tunngasumik akuerisaanera apeqqutaatinnagu Danmarkip Schengenimi avammut killeqarfigisaa, malillugu tamakku pillugit peqqussutitut naapertuuttumik SIS-imut nalunaarutigineqarsinnaalernerat, tamatuma aammattaaq tunngavilissavaa.

Nunami allamiut pillugit inatsimmi §§ 50-p aamma 50 a-p, Danmarkimi nunami allamiut pillugit inatsimmi atuuttumi oqaasertaasunut naapertuuttumik nutarterneqarnissaat, § 32-imut aaqqinneqartumut aamma peqqussutip allanngortinneqarnerani ilassutitut ilaapput. Nunamut isernissap inerteqqutigineqarnerata sivisussusiata, qularnaatsumik Danmarkip nunat tamat akornanni pisussaaffiinik akerliunissaanik kinguneqartussaassappat, §§ 50 imaluunniit 50 a malillugit aalajangiinernut atatillugu § 32 malillugu nunamut isernissap inerteqqutigineqarnerata sivikillineqarnissaannut periarfissiinissaq pissutigalugu tamanna pivoq. Danmarkimi nunami allamiut pillugit inatsimmi § 32-imut taanna assinguvoq aamma naalagaaffeqatiginnerup iluani assigiissaaneq taamaaliornerup qulakkiissavaa.

§ 33-ip aaqqinneqarnerata kingunerisaanik nunami allamiut pillugit inatsimmi §§ 33 a aamma 33 b Kalaallit Nunaanni pissutsinut

naleqqussaanerit allannguutigalugit, nunami allamiut pillugit inatsimmi Kalaallit Nunaannut atuuttumi ilanngunneqarnissaat, peqqussutip allanngortinneqarnerani aamma ilaavoq. Najugaqarnissamik akuersissut pillugu qinnuteqaatit arlaallit aamma Kalaallit Nunaannut aalajangiinerit suliareqqitassanngortinneqarneri pillugit suliarinninnerup nalaani najugaqarnissamik akuersissummik qinnuteqarnerup nalaani nunamiissinnaanerup suli nalunaarutigineqarsinnaanerata periarfissaanissaa pissutigalugu tamanna pivoq. Nunami allamioq najugaqarnissamik akuersissuteqarnissaq pillugu qinnuteqaatip suliarineqarnerata nalaani nunamiinnissamut pisinnaatitaaffeqarnera, najugaqarnissamik akuersissummik qinnuteqaatip suliarineqarnerata nalaani nunamiissinnaanerup kinguneraa. Aalajangiinerit aalajangersimasumik suussusillit naammagittaalliutigineqarneranni aamma sivitsuinissaq pillugu qinnuteqarnermi kinguartitsinermik sunniuteqartitsinermik periarfissamik aammattaaq tamanna tunniussivoq. Najugaqarnissamik akuersissuteqarnissaq pillugu qinnuteqaatip suliarineqarnerata nalaani nunamiissinnaaneq aamma kinguartitsitsinermik sunniuteqartitsisinnaaneq pillugit malittarisassat siusinnerusukkut § 33-iusumi takuneqarsinnaasimammata maluginiarneqassaaq.

Nunami allamiut pillugit inatsimmi § 32-p nutaamik oqaasertaliorneqarnerata, aamma Schengenimi paasissutissiuinermi systemip (SIS-ip) Kalaallit Nunaanni atuutilersinneqarnissaanik siunnersuutip kingunerisaanik, aammattaaq nunami allamiut pillugit inatsimmi § 58 g, imm. 1, nr. 10-p eqqunneqarnissaa aallarnerniarneqarpoq, tamatumalu kingorna nunami allamioq § 32, imm. 1, nr. 2 malillugu nunamut isernissamut inerteqquteqarnermik nalunaarfigineqarsimappat, nunani allamiunut oqartussaasunit nunami pingajuusumi innuttaasoq Schengenimi paasissutissiuinermi systemimi (SIS-imi) kissaatigineqanngitsutut nalunaarutigineqassaaq.

Tassunga atatillugu, Danmarkimut nunami allamiut pillugit inatsimmut atuuttumut naapertuuttumik, piginnaatitsineq pillugu §§ 58 g, imm. 4-imi aamma 58 h, imm. 3-mi aalajangersakkat aammattaaq aallarnerniarneqarput. SIS-imut nalunaarutiginninnerit, SIS pillugu peqqussut imaluunniit utertitsinissaq pillugu SIS-pillugu peqqussut malillugu suliarineqartut, nunani allamiut pillugit oqartussaasut akornanni suliassiissutigineqarsinnaanerata, matumani piffissap allaffimmiiffiusartup nalinginnaasup avataani, allannguutit kinguneraat. Nunani allamiut pillugit oqartussaasut imm. 1 malillugu siunnersuinissamik siunnersuuteqarsinnaanermut piginnaatinneqarnerat pillugu, matumani nunani allamiut pillugit

oqartussasoq alla sinnerlugu, malittarisassat erseqqinnerusut aalajangersarneqarsinnaanerit, allannguutit aammattaaq kinguneraat.

Naggataagut §§ 32-ip, 33-ip, 33 a-p aamma 33 b-p ilanngunneqarnerisa kingunerisaannik allannguutit kingunerisaanik sulii allanngortitsinerit annikinnerusut ilaatinneqarput. Nunami allamioq, nunami allamiut pillugit inatsimmi § 32 malillugu nunamut isernissamut inerteqquteqarnermik nalunaarfigineqartoq, nunamut isernissamut inerteqquteqarnerup annertussusaa aamma inatsisilerinnermut tunngasumik kingunissai pillugit ilitersuuneqarnissaa inatsisitigut tunngavilerneqarnissaa, allannguutit kingunerisaannik allanngortitsinerit ilaatigut qulakkiissavaat. Allannguutit tekniskiusumik pissuseqarput aamma inatsisinik atuuttunik ingerlatitseqqillutik. Allannguutissatut siunnersuutigineqartut §§ 46-imi, 48-imi, 49-imi, 53-imi aamma 53 a-mi takuneqarsinnaapput.

1.2. Aallaqqaasiussami SIS-, EES- aamma ETIAS pillugit peqqussutit taaneqartut saniatigut, nunani pingajuusuni innuttaasunut najugaqarnissamik akuersissutit assigiiartumik ilusilersorneqarnissaat pillugit peqqussummik kiisalu sunniuteqarluartumik suleqatigiissinnaanermut paasisutissanillu avitseqatigiissinnaanermut killiliussat aalajangersarneqarnerat pillugit peqqussutit marluk, aamma Schengenimi suleqatigiinnermut annertuumik pingaaruteqartut, EU-p akuersissutigisimavai. Najugaqarnissamik akuersissutit assileneqarnissaasa aamma peqquserlulluni allanngortinneqarnissaasa akornuserneqarnissaat aamma inatsisit unioqqutillugit nunasiartornerit pitsaaliorneqarnissaannut akiorneqarnissaannullu ilanngussinissaq, nunani pingajuusuni innuttaasunut najugaqarnissamik akuersissutit assigiiartumik ilusilersorneqarnissaat pillugit peqqussutip ilaatigut siunertaraa. Schengenimi killeqarfinni avallerni nakkutilliinnermi naammassisaqarsinnaassutsip pitsanngortinneqarnissaanik, inatsisit unioqqutillugit nunasiartortarnerup pitsaaliorneqarnissaanut aamma akiorneqarnissaanut aamma Schengenimi suliaasaqarfiup iluani isumannaatsuunissap qaffasissumik killilerneqarnissaanut ilanngussinissaq, sunniuteqarluartumik suleqatigiissinnaanermut paasisutissanillu avitseqatigiissinnaanermut killiliussat aalajangersarneqarnerat pillugit peqqussutit siunertaqarput.

Nunami allamiut pillugit inatsisip allanngortinneqarnera pillugu inatsisikkut nr. 463-ikkut, 18. maj 2011-imeersukkut, (nunani pingajuusuni naalagaaffinni innuttaasut inatsisit unioqqutillugit najugaqartut utertinneqarnissaannut ataatsimoorussamik tamanut atugassiat aamma ingerlatseriaatsit pillugit peqqussutip malitsigisaanik allanngortitsinerit il.il.),

nunani pingajuusuni innuttaasunut najugaqarnissamik akuersissutit assigiiaartumik ilusilersorneqarnissaat pillugit peqqussut, Danmarkimi naammassineqarpoq. Inatsit Kalaallit Nunaannut atuutinngilaq, kisianni inatsimmi § 3 malillugu, kunngip peqqussutaatigut tamakkiisumik ilaannakortumilluunniit, Kalaallit Nunaanni pissutsinut naleqqussaanerit allannguutigalugit, Kalaallit Nunaannut atuutilersinneqarsinnaavoq.

Nunami allamiut pillugit inatsisip, inunnut Ukrainimit qimaatitanut utaqqiisaagallartumik najugaqarsinnaanermut akuersissutit pillugit inatsisip, aamma angerlamut angalanissamut inatsisip allanngortinneqarneri pillugit inatsisikkut nr. 1575-ikkut, 12. december 2023-imeersukkut (Nunami allamiut Danmarkimut isernerat aamma najugaqarnerat pillugit oqartussaasut aamma politiit nakkutilliinermut sakkuisa patajaallisarneqarnerat), sunniuteqarluartumik suleqatigiissinnaanermut paasisutissanillu avitseqatigiissinnaanermut killiliussat aalajangersarneqarnerat pillugit peqqussutit malitsigisaannik, nunami allamiut pillugit inatsimmi allanngortitsinerit pisariaqartinneqartut naammassineqarput. Inatsit Kalaallit Nunaannut atuutinngilaq, kisianni inatsimmi § 7 malillugu, kunngip peqqussutaatigut tamakkiisumik ilaannakortumilluunniit, Kalaallit Nunaanni pissutsinut naleqqussaanerit allannguutigalugit, Kalaallit Nunaannut atuutilersinneqarsinnaavoq.

Najugaqarnissamik akuersissutit assigiiaartumik ilusilersorneqarnissaat pillugit peqqussutip kiisalu sunniuteqarluartumik suleqatigiissinnaanermut paasisutissanillu avitseqatigiissinnaanermut killiliussat aalajangersarneqarnerat pillugit peqqussutit, Danmarkimi peqqussutit naammassineqarnerinut pingaarnertut assingusut, Kalaallit Nunaanni naammassineqarnissaat missingiutikkut aallarnerniarneqarpoq.

1.3. Isernermut- aamma aallarnermut systemip piffissap ingerlanerani aallartitikkiartuaartinneqarnissaa pillugu EES pillugu peqqussummut naapeqatigiiffissatut siunnersuut pillugu Siunnersuisoqatigiit Europa-Parlamentillu akornanni 2025-imi maajimi isumaqatigiinneq anguneqarpoq. Peqqussutip inaarutaasumik 2025-imi juulimi akuersissutigineqarnissaa naatsorsuutigineqarpoq.

Nunami allamiut pillugit inatsisip, akuunerulersitsinissamut inatsisip aamma qallunaatut ilinniartinneqarnissaa pillugu inatsisip allanngortinneqarneri pillugit inatsisikkut nr. 756-ikkut, 20. juni 2025-imeersukkut (Aappaasumut nakuusernerup malitsigisaanik najugaqarsinnaanermut akuersissutit atatiinnarneqarnissaa pillugu malittarisassat allanngortinneqarnerat il.il.,

atorunnaarsitsisarneq pillugu malittarisassanit naalagaaffimmit aallartitaasut taakku ilaquataasa ilaasut mininneqarnerat, ilaqutariit ataatsimuulerseqqinneqartarnerannut suliasaqarfinni EU-mi sulisaatsip inatsisinngortinneqarnera, isernermut- aamma aallarnermut systemi pillugu EES pillugu peqqussutip aamma ilaasut pillugit siuningaani paasissutissat katersorneqarneqartarnerat nuunneqartarnerallu pillugit API pillugu peqqussutip piffissap ingerlanerani aallartitikkiartuaartinneqarnissaat il.il.) Danmarkip peqqussummut tassunga ilanngunnissaa siunertaralugu, nunami allamiut pillugit inatsimmi allannngortitsinerit pisariaqartinneqartut naammassineqarput.

Isernermut- aamma aallarnermut systemip piffissap ingerlanerani aallartitikkiartuaartinneqarnissaa pillugu EES pillugu peqqussutip, Danmarkimi peqqussutip naammassineqarnerinut pingaarnertut assingusoq, Kalaallit Nunaanni naammassineqarnissaa missingiutikkut aallarnerniarneqarpoq.

ETIAS pillugu peqqussut pillugu aalajangersakkap atorunnaarsinneqarnissaa ikkuteqqinneqarnissaalu tassunga atatillugu aallarnerniarneqarpoq. Taanna taamaallaat inatsisilerinikkut pitsaassutsinik isumaannerinninneruvoq.

Kalaallit Nunaanni visummimik peqarnissamik pisussaaffeqarlutik innuttaassusillit, nuna tamakkerlugu qaammatit 3 qaangerlugit najugaqarsinnaanerannut periarfissaq pillugu nutaamik ikkusseqqinnissaq, tassami tassunga atatillugu peqqussummi nr. 759-imi, 12. juni 2023-imeersumi aalajangersakkap nutaamik oqaasertaliorneqarnerani taanna siunertarineqanngitsumik peerneqarmat, nunami allamiut pillugit inatsimmi, kunngip peqqussutaatigut nr. 150-ikkut, 23. februar 2001-imeersukkut Kalaallit Nunaannut atuutilersinneqartumi § 4, imm. 3-mi aalajangersakkap aammattaaq missingiutikkut ikkuteqqinneqarnissaa aallarnerniarneqarpoq.

Tamatuma saniatigut, taama tulliullutik, 8. december 2022-imeersumi, 25. april 2023-imeersumi aamma 30. december 2023-imeersumi Siunnersuisoqatigiit aalajangiineri nutaat tunngavigalugit, nunat sorliit Schengenimi isumaqatigiisummi nunatut ilaasortaanersut pillugit, missiutikkut § 2 a, imm. 2-p allannngortinneqarnissaa aallarnerniarneqarpoq.

Tamanna pillugu pineqartoq EES pillugu peqqussut malillugu pisussaajunnaarsinneqarsimanngippat, isernermut- aamma aallarnermut systemimi inunnut ataasiakkaanut suliamut mappimik pilersitsinermit atorineqartussamik imaluunniit isernermi- aamma aninermi nakkutilliinissaq

siunertaralugu, nunami allamiup timikkut asseqanngitsumik ilisarnaatit pillugit paasissutissat pisariaqartinneqartut tunniutissagai, nunami allamiup § 39, imm. 5-imi periarfissaliissummik ilanngussisoqarnissaa aammattaaq aallarnerniarneqarpoq.

Schengenimi suleqatigiinneq aamma EU-mi inatsisilerinermut tunngasumik aalajangiinerit pillugit ilanngussaq 1 innersuussutigineqarpoq.

2. Sivisunerusumik najugaqarnissamik visummip (visummip sivisuumik atuuttussap) atulersinneqarnissaa pillugu malittarisassat atuutilersinneqarneri

Nunami allamiut pillugit inatsimmi § 4a, imm. 2 (aallaqqaataani imm. 3-jusimasoq), visummip sivisuumik atuuttussap, Danmarkimut atuuttussatut killilerneqartup, atulersinneqarnissaanik imaqartoq, nunami allamiut pillugit inatsimmi Danmarkimut atuuttumi, Siunnersuisoqatigiit peqqussutaata (EF) nr. 380/20081-p, ilaatigut najugaqarnissamik akuersissutit, siusinnerusukkt EU-mi najugaqarsinnaanermut mærkitut nipitittakkatut ilusilerlugu uppersaattitut atulersinneqarsinnaasartoq, taamaallaat timikkut asseqanngitsumik ilisarnaatitalimmik najugaqarnissamik uppersaammik atulersitsisoqarsinnaanissaat, atortuulersinneqarneranut atatillugu ilanngunneqarpoq. Nunami allamiut nunami angerlarsimaffigisaani najugaanut toqqaannartumik timikkut asseqanngitsumik ilisarnaatitalimmik najugaqarnissamik uppersaammik nassinneqarnissaanut isumannaallisaanermut tunngasumik ilaatigut naleqquttutut isigineqanngimmat, nunami pingajuusumi innuttaassusillit, Danmarkimi najugaqarnissamik akuersissummik nalunaarfigineqarsimasut, qanoq ilillutik toqqaannaq imaluunniit nunani Schengenimi isumaqatigiisummi ilaasuni isersinnaanerat aamma najugaqarnissamik uppersaammik atulersinneqartumik pisinnaanerat pillugit, nutaamik sulisaatsimik aalajangersaasoqarnissaanik pisariaqartitsineq pilersimavoq. Inatsisissatut siunnersuut nr. 167, 16. marts 2011-imeersoq innersuussutigineqarpoq.

Nunami allamiut pillugit inatsimmi § 4 a, imm. 2 Kalaallit Nunaannut atuutilersinneqanngilaq. Taamaattoq nunani allani qallunaat sinniisoqarfiisa visumminik sivisuumik atuuttussanik Kalaallit Nunaannut atuuttuussuseqartunik aalajangiisinnaaneq aamma piginnaatitaaneq pillugit, nunanut allamiunut, Kalaallit Nunaanni najugaqarnissamik nalunaaruteqarfigineqartunut, Kalaallit Nunaannullu isersinnaanissaq siunertaralugu visummimik atorfissaqartitsisimasunut, Udlændingestyrelsi

¹ [RÅDETS FORORDNING \(EF\) Nr. 380/2008 af 18. april 2008 om ændring af forordning \(EF\) nr. 1030/2002 om ensartet udformning af opholdstilladelser til tredjelandsstatsborgere](#)

(US) aamma Styrelsen for International Rekruttering aamma Integration (SIRI) ukiut amerlasuut ingerlaneranni aalajangersimasumik sulisaatsimik pilersitsisimapput.

Nunami allamiut pillugit inatsimmi § 4 a, imm. 2-p, Kalaallit Nunaanni pissutsinut naleqqussaanerit allannguutigalugit, Kalaallit Nunaannut atuutilersinneqarnissaa aallarnerniarneqarpoq. Sivilisunerusumik najugaqarnissamik visummimik (visummimik sivilisuumik atuuttussamik), taamaattoq sivilisunerpaamik piffissami ukiumik 1-mik sivilisussusilimmik atuuffeqartussamik, nunami allamiunut, suliat suussusaanni tulliuttuni najugaqarnissamik akuersissummik nalunaaruteqarfigineqarsimasunut, Kalaallit Nunaannut killeqartinneqartumik atulersitsinissamut, nunami allamiut pillugit inatsisip Kalaallit Nunaannut atulersinneqarnera pillugu peqqussummi erseqqissumik periarfissaliisummik peqalernissaa, tamatuma kingunerissavaa: 1) Nunami allamiunut, siusinnerusukkut qallunaatut innuttaassuseqarsimasunut, najugaqarsinnaanermut akuersissuteqarnissaq pillugu suliani, 2) Inunnut Kalaallit Nunaanni najugaqartunut ilaquuttatut attaveqarnerup malitsigisaanik najugaqarsinnaanermut akuersissuteqarnissaq pillugu suliani, 3) Kalaallit Nunaanni sulinerumut imaluunniit inuussutissarsiornermut tunngasunik eqqarsaatigisassat malitsigisaannik najugaqarsinnaanermut akuersissutit pillugit suliani, 4) Upperisamut tunngassuteqartumik ajoqersuisutut il.il. imaluunniit suliffimmi sungiusarnissaq siunertaralugu ilinniartutut- imaluunniit au pair-itut najugaqarneq pillugu najugaqarsinnaanermut akuersissuteqarnissaq pillugu suliani, 5) Inunnut, upperisamut tunngassuteqartumik ajoqersuisutut il.il. imaluunniit ilinniartutut imaluunniit suliffik tunngavigalugu Kalaallit Nunaanni najugaqarsinnaanermut akuersissummik pisimasut ilaqutaannut ingerlaqataasunut najugaqarsinnaanermut akuersissutit pillugit suliani. Nunami allamiup Kalaallit Nunaannut isersinnaanera aamma timikkut asseqanngitsumik ilisarnaatitalimmik najugaqarnissamik uppersaammik atulersinneqartumik pisinnaanera, visummip sivilisuumik atuuttussap atulersinneqarnerani siunertarineqarpoq.

Peqqussummi § 46, imm. 1 malillugu, US aamma SIRI suli tassaassapput Kalaallit Nunaannut visummimik sivilisuumik atuuttussamik atulersitsineq pillugu aalajangiisussat. Soorlu aamma aalajangiinerit, Kalaallit Nunaannut visummimik sivilisuumik atuuttussamik atulersitsineq pillugu US-imit aamma SIRI-mit aalajangerneqartut, Kalaallit Nunaanni najugaqarnissaq pillugu aalajangiinerit allat US-imit aamma SIRI-mit aalajangerneqartut ministereqarfimmut aamma naammagittaalliutigineqarsinnaasut assigalugit, peqqussummi § 46, imm. 2 malillugu Udlændinge- aamma Integrationsministereqarfimmut naammagittaalliutigineqarsinnaassapput.

3. Kalaallit Nunaanni najugaqarnissamik akuersissummik qinnuteqaatit suliarineqarneri akiliutinik aningasalersorneqartoq

Nunami allamiut pillugit inatsimmi § 9 h malillugu, Danmarkip nunat tamat akornanni pisussaaffiini imaluunniit EU-mi malittarisassat allatut naalakkiuteqartoqanngippata, nunami allamioq, kingusinnerpaamik qinnuteqaammik tunniussinermi peqatigisaanik, nunami allamiut pillugit inatsimmi aalajangersakkat arlallit taagorneqartut malillugit akiliummik akiliissaaq. Taamaalilluni nalilersuinerup piviusup kingorna, nunami allamiumut kinaagaluarnersumut akiliummik akiliinissamik piumasagaat avaqqunneqanngippat, Danmarkimi najugaqarsinnaanermik akuersisummik qinnuteqaatip, aalajangiinnermut naammagittaalliuutip imaluunniit najugaqarsinnaanermik akuersisummik aalajangiineq pillugu suliap suliareqqinneqarnissaa pillugu noqqaassut, akiliummik akiliinissamik piumasagaateqarfiuvoq. Akiliut aningaasartuutit tunngavigalugit akilerneqassasoq, § 9 h, imm. 4-mi takuneqarsinnaavoq.

Nunami allamiut pillugit inatsimmi § 9 h-p, Kalaallit Nunaanni pissutsinut naleqqussaanerit allannguutigalugit, Kalaallit Nunaannut atuutilersinneqarnissaa aallarnerniarneqarpoq. Nunami allamiut pillugit inatsit pillugu Kalaallit Nunaannut peqqussummi tulliuttut pillugit akiliummik akileeqqusisoqarnissaanut periarfissaliissuteqalernissaa tamatuma kingunerissavaa, 1) nunanit allamiunut, siusinnerusukkt qallunaatut innuttaassuteqartut, najugaqarsinnaanermik akuersisummik qinnuteqaammut, 2) inunnut Kalaallit Nunaanni najugalinnut ilaqutariinnut tunngasumik atassuteqarnerup malitsigisaanik najugaqarsinnaanermik akuersisummik qinnuteqaammut, 3) Kalaallit Nunaanni sulinnermut imaluunniit inuussutissarsiornermut tunngasumik eqqarsaatigisassat malitsigisaannik najugaqarsinnaanermik akuersisummik qinnuteqaammut, 4) upperisarsiornermut tunngasumik nalunaajaasutut il.il. najugaqarsinnaanermik akuersisummik qinnuteqaammut, 5) ilinniartutut imalluunniit suliffimmi sungiusarnissaq- imaluunniit au pairitut najugaqarnissaq siunertaralugu najugaqarsinnaanermik akuersisummik qinnuteqaammut, 6) inunnut upperisarsiornermut tunngasumik nalunaajaasutut Kalaallit Nunaanni najugaqarsinnaanermik akuersisummik pisimasunut ilaqutaasutut ilasimasunut najugaqarsinnaanermik akuersisummik qinnuteqaammut, 7) inunnut ilinniartutut imaluunniit suliffeqarneq tunngavigalugu Kalaallit Nunaanni najugaqarsinnaanermik akuersisummik pisimasunut ilaqutaasutut ilasimasunut najugaqarsinnaanermik akuersisummik qinnuteqaammut. Najugaqarnissamik akuersissuteqarnissaq pillugu qinnuteqaatinik taakkuninnga aamma piffissaligaanngitsumik najugaqarsinnaanermut akuersissuteqarnissaq pillugu qinnuteqaatinik tunniussinermut akiliummik akileeqqusisoqarsinnaanera aammattaaq periarfissaassaaq. Tamatuma

saniatigut suliap suliareqqinneqarnissaanik qinnuteqaammut, tassani Udlændingestyrelsi, Styrelsen for International Rekruttering aamma Integration imaluunniit Udlændinge- og Integrationsministereqarfik malittarisassat pineqartut malillugit najugaqarnissamik akuersisummik qinnuteqaat malillugu aalajangiisimalluni, akiliummik akileqqusisoqarnissaanik periarfissaliissuteqalernissaa, malittarisassat atuutilersinneqarnerisa kingunerissavaat.

Peqqussutip allanngortinneqarnerata atuutilersinneqarneranut uiggiullugu, ilaqutariit ataatsimuulserseqqinneqarnerat, piffissaligaanngitsumik najugaqarsinnaanermut akuersissutit, upperisarsiornermut tunngasumik nalunaajaasut kiisalu ilinniarneq aamma inuussutissarsiorneq il.il. pillugit suliassa qarfinnut qinnuteqaatit naammagittaalliutillu tunniunneqarnerannut akiliutit pillugit Kalaallit Nunaannut nalunaarummik udlændinge- aamma integrationsministeri atulersitsissasoq naatsorsuutigineqarpoq.

Danmarkimi akiutit killiffiisa assinginik, akiliutit annertuussusissaat aalajangersarneqassasoq naatsorsuutigineqarpoq. Sulisitsisut akiliutininik akiliinissaannik naalakkiisunik, nalunaarummi malittarisassanik aalajangersaasoqarsinnaassanngilaq.

4. Atorfinitsinneqarneq inatsisinut naapertuuttumik sulisitsisut sulisullu akornanni saqitsaannermik ilaappat, sulineq tunngavigalugu najugaqarnissamik akuersissutip itigartitsissutigineqarnera pillugu nunami allamiut pillugit inatsimmi malittarisassat atuutilersinneqarneri.

Atorfinitsinneqarneq taanna, nunami allamiup isumaqatigiissutigisimasaa imaluunniit neqeroorutisiarisimasaa, inatsisinut naapertuuttumik sulisitsisut sulisullu akornanni saqitsaannermi ilaappat, nunami allamiut pillugit inatsimmi § 9 a, imm. 9-mi oqaaseqatigiit siulliit malillugit, Danmarkimi inuussutissarsiornermut aaqqissuussinerit arlallit malillugit najugaqarnissamik akuersissut tunniunneqarsinnaanngilaq. Pineqartoq nunami allamiuusimappat, qallunaatut innuttaassuseqartup atorfinitsinneqarnissamik isumaqatigiissusiaa imaluunniit neqeroorutisiarisimasaa inatsisinut naapertuuttumik sulisitsisut sulisullu akornanni saqitsaannermi ilaappat, Danmarkimi inuussutissarsiornermi aaqqissuussinerit arlallit assigiinngitsut malillugit najugaqarnissamik akuersisummik angusisinnaasimassagaluartumut, nunami allamiumut, ilaqutariinnut tunngassuteqartumik qallunaatut innuttaassusilimmik, nunami allami najugaqartumik atassuteqartumut § 9 a, imm. 9-mi oqaaseqatigiit aappaat malillugit aammattaaq najugaqarnissamik akuersisummik tunniussisoqarsinnaanngilaq.

Nunanit allamiut pillugit inatsisip, akuunerulersitsinissamut inatsisip, aamma Det Centrale Personregister pillugu inatsisip allanngortinneqarneri pillugu inatsisikkut nr. 1488-ikkut, 23. december 2014-imeersukkut (Nunat tamat akornanni inuuttassarsiuissarnermik il.il. aaqqissuusseqqinneq il.il.) malittarisassaq ilanngunneqarpoq.

Nunami allamiut pillugit inatsimmi § 9 a, imm. 9-p, Kalaallit Nunaanni pissutsinut naleqqussaanerit allannguutigalugit, Kalaallit Nunaannut atuutilersinneqarnissaa aallarnerniarneqarpoq. Atorfinitsinneqarfissatut suliaasaqarfik piviusoq inatsisinut naapertuuttumik sulisitsisut sulisullu akornanni saqitsaannermi ilaatinneqarpat, Kalaallit Nunaanni sulinissaq tunuliaqutaralugu najugaqarnissamik akuersissummik qinnuteqaat siunissami itigartitsissutigineqartarnissaa, tamatuma kingunerissavaa. Saqitsaannerup inatsisinut naapertuunnera innersuussutigalugu, nunami allamiumit najugaqarnissamik akuersissummik qinnuteqaammik itigartitsissutigineqarnerata kingorna, saqitsaanneq atorunnaarsinneqarpat, taamaattoqarpat nunami allamioq qinnuteqaammik nutaamik tunniussissaaq. Itigartitsinerup kingorna sulisitsisut sulisullu akornanni saqitsaanneq isumaqatigiissummut akerliusutut imaluunniit inatsisinut akerliusutut aalajangiiffigineqarpat, suliap suliareqqitassanngortinneqarnissaa piumasagaatigineqarsinnaavoq.

Najugaqarnissamik sulinissamullu akuersissutip sivitsorneqarnissaanik qinnuteqaat, nunamit allamiumit, atorfinitsitaanermi atugassarititaasuni, inatsisinut naapertuuttumik sulisitsisut sulisullu akornanni saqitsaannermi ilaasuni sulisumit, tunniunniunneqartoq, saqitsaannerup naanissaanut imaluunniit isumaqatigiisutut akerliusutut imaluunniit allatut inatsisinut akerliusutut aalajangiiffigineqarnissaanut unitsikkallarneqassaaq. Nunami allamioq, sivitsuinnissamik qinnuteqarsimasoq, Kalaallit Nunaanni najugaqarnini, sivitsuinnissamik qinnuteqaatip aalajangiiffigineqarnissaata tungaanut, ingerlatiinnarsinnaavaa.

Nunami allamiut pillugit inatsimmi § 44 h malillugu, suliffeqarfik inatsisinut naapertuuttumik sulisitsisut sulisullu akornanni saqitsaannermi ilaatinneqalerpat, aamma sulineramik inuussutissarsiutillit kattuffiata siusinnerusukkut aqutsisoqarfirmut nalunaarutigisimasaa atorunnaarsinneqarpat imaluunniit annertusineqarpat, sulineramik inuussutissarsiutillit kattuffii SIRI-mut nalunaaruteqartassapput. Nunanit allamiut pillugit inatsisip, akuunerulersitsinissamut inatsisip, aamma Det Centrale Personregister pillugu inatsisip allanngortinneqarneri pillugu inatsisikkut nr. 1488-ikkut, 23. december 2014-imeersukkut (Nunat tamat

akornanni inuttassarsiuisarnermik il.il. aaqqissuusseqqinneq il.il.) malittarisassaq ilanngunneqarpoq.

Nunami allamiut pillugit inatsimmi § 44 h-p, Kalaallit Nunaanni pissutsinut naleqqussaannerit allannguutigalugit, Kalaallit Nunaannut atuutilersinneqarnissaa aallarnerniarneqarpoq. § 44 h § 9 a, imm. 9-mut, aamma Kalaallit Nunaannut atuutilersinneqartumut, atatillugu isiginiarneqassaaq. Atorfinitsitaaneq, nunami allamiup isumaqatigiissutigisimasaa imaluunniit neqeroorutisiarisimasaa, inatsisinut naapertuuttumik sulisitsisut sulisullu akornanni saqitsaannermi, najugaqarnissamik akuersissummik nalunaaruteqarnissamut ajoqutaasussamik, ilaanersoq pillugu SIRI-p isummernissamik periarfissinneqarnissaanut § 44 h-mi malittarisassat Kalaallit Nunaannut atuutilersinneqarnissaanni siunertarineqarpoq.

Ilanngussaq 1

Schengenimi suleqatigiinneq aamma EU-mi inatsisilerinermut tunngasumik aalajangiinerit pillugit

Ataatsimoorussamik suliassaqarfimmi passimik takutitseqqaarani imaluunniit nunat assigiinngitsut killeqarfiimi nakkutilliivigineqarani piumasamik pilluni angalasinnaanerup pilersinneqarnissaa, Schengenimi suleqatigiinnerup siunertarivaa. Suleqatigiinnermut ilaatillugu Schengenimi suliassaqarfiup iluani ataatsimoorussamik killeqarfinniit inunnik nakkutilliineq atorunnaarsinneqarpoq. Tassunga taarsiullugu ilaatigut Schengenimi suliassaqarfiup killeqarfiisa avalliit aqqusaarneqarnerannut malittarisassat ataatsimoorussat eqqunneqarput aamma killeqarfiit qaangerlugit inatsisillu unioqqutillugit nunasiartornerup akiorneqarnissaa pillugit suleqatigiinneq pilersinneqarluni. Danmarkip, soorlu nunat allat, Schengenimi suleqatigiinnermi ilaasut assigalugit, Danmarkip killeqarfiini avallerni sunniuteqarluartumik nakkutilliinissaq naammassissavaa.

Savalimmiut aamma Kalaallit Nunaat Schengenimi suleqatigiinnermi peqataangillat. Isumaqatigiisummi aalajangersakkat Savalimmiunut aamma Kalaallit Nunaannut atuutissanngitsut, Schengenimi isumaqatigiisummut ilaalernissamik qallunaat akuersissutaanni artikili 5, imm. 1-p taamaalilluni malitsigaa. Tamatuma peqatigisaanik kisianni inunnik, illuatungaani Savalimmiunit aamma Kalaallit Nunaannit illuatungaani nuunat, Schengenimi suleqatigiinnermi peqataasut akornanni angalasunik nakkutilliisoqassanngitsaq, artikili 5, imm. 2-mi takuneqarsinnaavoq. Tamanna ilaalernissamut isumaqatigiisummut akerliunngippat imaluunniit akornutaanngippat, ilaalernissamut

isumaqatigiisummi artikili 6 malillugu ilaalernissamut isumaqatigiisummi nunat avannarliit iluanni passi pillugu peqatigiilluni suleqatigiinnerup iluani suleqatigiinneq akornuserneqanngilaq. Savalimmiut aamma Kalaallit Nunaata, aamma Danmarkip Schengenimi suleqatigiinnermut ilanngunnerata kingorna sulii angalanermut aaqqissuussinermi, nunat avannarliit iluanni passi pillugu peqatigiilluni suleqatigiinnermut killiussat iluanni peqataasinnaanerat, taamaaliornikkut qulakkeerneqarpoq, matumani nunat avannarliit iluminni killeqarfiinik ataatsimoorussamik passinik nakkutilliisarnerup atorunnaarsinneqarnera pillugu aamma nunat avannarliit avammut killeqarfiini nakkutilliinerup isumagineqarnissaanik pisussaaffeqarneq ilanngullugit. Nunat avannarliit passi pillugu peqatigiilluni suleqatigiinnerat 1961-imi Savalimmiut ilanngunneqarnerisigut annertusineqarpoq. Kalaallit Nunaat nunat avannarliit passi pillugu peqatigiilluni suleqatigiinneranni ilaanngilaq, kisianni angalanermi aaqqissuussinermut, passi pillugu peqatigiilluni suleqatigiinnerup iluani killiussani aalajangersarneqartuni peqataalluni.

Killeqarfiit avalliit sunniuteqarluartumik nakkutilliivigineqarnissaat, kiisalu nunanut Schengenimi suleqatigiinnermut ilaanngitsunut Savalimmiuni aamma Kalaallit Nunaanni killeqarfiit avalliit sunniuteqarluartumik nakkutilliivigineqarnissaat nakkutigineqarnissaallu, kiisalu iluutsit taarsiissutaasut pisariaqartinneqartut, matumani Schengenimi paasissutissiuinermi systemip (SIS-ip) atorneqarnissaa pillugu malittarisassat atuutilersinneqarsimanerat aamma sunniuteqarluarnerat ilaalernissamut isumaqatigiissutit naammassineqarnissaanut piumasaqaataasoq, tassunga atatillugu qallunaat Schengenimut isumaqatigiisummut ilaalernissamik isumaqatigiissutaani allattaaviup naggataani takussutissami aalajangerneqarpoq. Taamaalilluni qallunaat ilaalernissamut isumaqatigiissutaanni allattaaviup naggataani takussutissami savalimmiut Kalaallillu Nunaata killeqarfiini avallerni aamma sunniuteqarluartumik nakkutilliinissaminut nakkutiginninnissamillu Danmarkip pisussaaffilerpoq. savalimmiut aamma Kalaallit Nunaata killeqarfiisa avalliit sunniuteqarluartumik nakkutilliivigineqarnissaanut atugassanik SIS-imi paasissutissat Savalimmiunit aamma Kalaallit Nunaannit tikinneqarsinnaassasut, allattaaviup naggataani takussutissani taamatuttaaq takuneqarsinnaavoq. Allattaaviup naggataani takussutissat Savalimmiunit aamma Kalaallit Nunaannut tunngatillugu Schengen pillugu malittarisassat pillugit piumasaqaatinik peqqissaarunnerusanik tigussaasunik allattuinnngilaq.

Schengenimi suleqatigiinnermut aamma killeqarfinnik nakkutilliinermut aamma EU-mi killeqarfiit qaangerlugit pinerluttuliornerup akiorneqarnissaata ikorfartorneqarnissaanut annertuumik pingaarutilinnik EU-mi peqqussutit arlallit akuerineqarsimapput. Peqqussutit naammassineqareersut, soorlu Schengenimi killeqarfiit pillugit malittarisassat, SIS pillugu peqqussutit, EES pillugu peqqussut aamma

ETIAS pillugu peqqussut, massakkuugallartoq peqqussutit tulliuttut pineqarput:

- Nunanit pingajuusunit innuttaasunut najugaqarsinnaanermik akuersissutit assigiiaartumik ilusilersorneqarnissaat pillugit Siunnersuisoqatigiit peqqussutaat (EF) nr. 1030/2002, 13. juni 2002-imeersoq kingusinnerusukkullu allannguutai.
- Killeqarfiit aamma visummit pillugit EU-mi paasissutissat pillugit systemit akornanni sunniuteqarluartumik suleqatigiissinnaanermut paasissutissanillu avitseqatigiissinnaanermut killiliussat aalajangersarneqarnerat pillugit Europa-Parlamentip aamma Siunnersuisoqatigiit peqqussutaat (EU) 2019/817. 20. maj 2019-imeersoq, aamma Europa-Parlamentip aamma Siunnersuisoqatigiit peqqussutaat (EF) nr. 767/2008, (EU) 2016/399, (EU) 2017/2226, (EU) 2018/1240, (EU) 2018/1726 aamma (EU) 2018/1861, Siunnersuisoqatigiit aalajangiinerat 2004/512/EF aamma Siunnersuisoqatigiit aalajangiinerat 2008/633/RIA.
- Politiit akornanni suleqatigiinnermut aamma inatsisilerinnermut tunngasumik suleqatigiinnermut, qimaasunut aamma nunasiartortarneq pillugit aamma immikkoortut taakku SIS-imut tunngassuteqartut, EU-mi paasissutissat pillugit systemit akornanni sunniuteqarluartumik suleqatigiissinnaanermut paasissutissanillu avitseqatigiissinnaanermut peqqussutini killiliussat pillugit aalajangersaanerit pillugit Europa-Parlamentip aamma Siunnersuisoqatigiit peqqussutaat (EU) 2019/818, 20. maj 2019-imeersoq aamma peqqussutit (EU) 2018/1726-p, (EU) 2018/1862-p aamma (EU) 2019/816-p allanngortinneqarneri pillugit.
- Isernermut- aamma aallarnermut systemip (EES-ip) piffissap ingerlanerani aallartitikkiartuaartinneqarnissaa taassumalu kingusinnerusukkut allannguutai pineqartillugit, utaqqiisaagallartumik EES pillugu peqqussummi aamma Schenginimi killeqarfiit pillugit malittarisassat ilaasa utaqqiisaagallartumik avaqqunneqarsinnaanerat pillugit peqqussutissatut siunnersuut.

Inatsisilerinnermut tunngasut aamma nunap iluani suliassaqarfiit pillugit qallunaat nangaassutaanni (aallaaviatigut EU-p killeqarfiit pillugit nakkutilliineranik, nunat allamiut pillugit politikianik, inuit sakkutuujunngitsut, pillaasarneq aamma politiit pillugit Danmarkip avataanniinnera) peqqussutit ilaatinneqarput. Schengenimi malittarisassanik peqqussutit pitsanngorsaataammata, qallunaat naalakkersuisuisa Danmarki sinnerlugu peqqussutit akuersissutigaat aamma taamaaliormikkut Danmarkip aamma naalagaaffiit ilaasortaasut allat aamma Schengenimi nunat ilaasut, peqqussutinit pituttorneqartut akornanni, naalagaaffiit akornanni pisussaaffimmik pilersitsipput.

Najugaqarnissamik akuersissutit assigiissaartumik ilusilersorneqarnissaat pillugu peqqussutikkut, naalagaaffiit ilaasortaasut visummit sivisuumik atuuttussat aamma – najugaqarnissamik akuersissutit pillugit ingerlatseriaatsinut malittarisassat aalajangersarneqarput.

Aammattaaq inatsisissatut siunnersuummut nr. 167-imut, 16. marts 2011-imeersumut innersuussisoqarpoq.

Sunniuteqarluartumik suleqatigiissinnaanermut paasissutissanillu avitseqatigiissinnaanermut killiliussat aalajangersarneqarnerat pillugit peqqussutitigut, isernermut- aamma aallanermut systemip (EES-ip), visummit pillugit paasissutissiuinermi systemip (VIS-ip), angalaneq pillugu paasissutissat aamma aallarnissamut akuersissutit pillugit EU-p systemia (ETIAS), Eurodac, Schengenimi paasissutissiuinermi systemip (SIS-ip), aamma nunani pingajuusuni innuttaasut pillaatissinneqarsimasut pillugit nalunaarsuiffinnit paasissutissanik avitseqatigiinnissamut europamiut paasissutissiuinermi systemiata (ECRIS-TCN-ip) akornanni, sunniuteqarluartumik suleqatigiissinnaanerup paasissutissanillu avitseqatigiissinnaanerup qulakkeerinninnissaanut killiliussaq aalajangersarneqarpoq.

Sunniuteqarluartumik suleqatigiissinnaanerup paasissutissanillu avitseqatigiissinnaanerup qulakkeerneqarneratigut, killeqarfinni avallerni isernermut- aamma aallanermut nakkutilliinermi sunniunniuteqarluartumik nakkutilliinerup pitsanngorsaavigineqarnissaa aamma siunertarisaminut naleqquttuunissaa, inatsisinik unioqquitsisumik nunasiartortarnerup pitsaaliorneqarnissaanut aamma akiorneqarnissaanut peqataanissaq, qaffasissumik isumannaatsuunissamut peqataanissaq, visummit pillugit ataatsimoorussamik politikkeqarnissap naammassineqarnissaata pitsanngorsaarneqarnera, nunat tamat akornanni illersorneqarnissamik qinnuteqaatit pillugit misissuineri ikiuineq, peqqarniisaarniarnerit aamma iliuutsit ilungersunartut pillaatissiissutaasinnaasut allat pitsaaliorneqarnissaannut, paasineqarnissaannut aamma pinerluttoqarsimaneranik paasiniaaffigineqarnissannut peqataanissaq aamma inuit ilisimaneqanngitsut kinaassusersineqarnissaasa ajornannginnerulernissaanut ikiuunnissaq, peqqussutit siunertarivaat.

Peqqussutitigut ilaatigut europami ujaasinissamut pulaffik pilersinneqassaaq, taakkualu ilaatigut VIS-imi, ETIAS-imi, Eurodac-imi, SIS-imi aamma ECRIS-TCN-imi, ataatsimoorussamik timikkut asseqanngitsumik ilisarnaatinik assigiissitsinermut sullissivimmi aamma ataatsimoorussamik kinaassutsinut nalunaarsuiffimmi, ataatsikkut apeqquteqaateqarnissaq periarfississavaat.

Aammattaaq inatsisissatut siunnersuummi nr. L 40-imi, 5. oktober 2023-imeersumi immikkoortoq 2.7 innersuussutigineqarpoq.

Isernermut- aamma aallarnermut systemip (EES-ip) piffissap ingerlanerani aallartitikkiartuaartinneqarnissaa pineqartillugu, utaqqiisaagallartumik EES pillugu peqqussummi aamma Schengenimi killeqarfiit pillugit malittarisassat ilaasa utaqqiisaagallartumik avaqqunneqarsinnaaneratt pillugit peqqussutissatut siunnersuutikkut, EES-ip piffissap ingerlanerani aallartitikkiartuaartinneqarnissaa, EES pillugu peqqussummi Schengenimi aamma killeqarfiit pillugit malittarisassat aalajangersakkat ilaasa avaqqunneqarsinnaanerannik ilallugit, tunngavissaq pilersinneqarpoq, tassanilu naalagaaffiit ilaasortaasut tamakkiisumik systemimik atuinissat piumasagaataavoq.

Ilaatigut naalagaaffiit ilaasortaasut qanoq piareersimatiginertik tunngavigalugu EES-imik atuilernissamut naleqqussarnissamik, aamma pitsaannerusumik ingerlatsiumalluni aamma killeqarfinni avallerni utaqqisarnerit sivisuut pinissat pinaveersaartinniarlugit, systemip piffissap ingerlanerani eqqukkiartuaartitsinissaannik, siunnersuutip taamaalilluni tunivai.

Siunnersuut EU-mi juli 2025-imi inaarutaasumik akuersissutigineqarnissaa naatsorsuutigineqarmat, maluginiarneqassaaq.

Aammattaaq inatsisissatut siunnersuummi nr. L 196-imi, 4. juni 2025-imeersumi immikkoortoq 2.4 innersuussutigineqarpoq.